



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKO VIJEĆE

Broj: 01-05-4-182-3/18

Datum: 01.02.2018. godine

Z A P I S N I K

SA 15. SJEDNICE OPĆINSKOG VIJEĆA TEŠANJ, ODRŽANE DANA 31.01.2018. GODINE (srijeda), S POČETKOM U 14,00 SATI, U SALI OPĆINSKOG VIJEĆA TEŠANJ

Sjednici prisustvovala 23 vijećnika.

Odsutni: Jupić Mirano i Omić Mirsad.

Zamjenik Predsjedavajućeg Vijeća Piro Amir i vijećnik Hrnjić Muris napustili sjednicu u 17,05 sati, a vijećnica Alić Munevera u 17,50 sati.

Gosti: Komandir Policijske stanice Tešanj g-din Jusuf Katica.

Sjednici prisustvovali: Općinski načelnik Suad Huskić sa saradnicima.

SREDSTVA JAVNOG INFORMISANJA:

Predstavnici TV "Smart".

Elektronsko glasanje, vremensko praćenje diskusija i zapisnik vodi Sajda Klepić.

Sjednicom predsjedava predsjedavajući Vijeća g-din Senad N. Subašić.

Nakon prijave vijećnika, Predsjedavajući Vijeća je konstatovao da današnjoj sjednici Vijeća prisustvuje 23 vijećnika, čime su se stekli uslovi za punovažno odlučivanje, otvorio 15. sjednicu Vijeća i proglasio je javnom, te u ime Vijeća i u svoje lično ime pozdravio prisutne goste i predstavnike medija.

Ad. A

Općinsko vijeće je jednoglasno sa 23 glasa "ZA", bez glasova "PROTIV" i "UZDRŽAN" usvojilo sljedeći

ZAKLJUČAK

Usvaja se Zapisnik sa 14. sjednice Općinskog vijeća Tešanj.

Dnevni red

Općinsko vijeće je jednoglasno sa 23 glasa "ZA", bez glasova "PROTIV" i "UZDRŽAN" usvojilo sljedeći dnevni red:

1. Prijedlog Odluke o izmjenama i dopunama Poslovnika o radu Općinskog vijeća Tešanj,
2. Prijedlog Odluke o prodaji parcele oznake k.p. br. 1897/3 za k.o. Trepče,
3. Prijedlog Odluke o usvajanju planova potencijalnih projekata javno-privatnog partnerstva,
4. Prijedlog Odluke o pristupanju izradi Zoning plana "Poslovna zona Ljetinić" Tešanj,
5. Izvještaj o realizaciji kapitalnih investicija za 2017. godinu,
6. Prijedlog Odluke o usvajanju Plana kapitalnih investicija za budžetsku 2018.godinu (sa planom kandidovanih investicija za 2019 i 2020) 1+2,
7. Prijedlog Odluke o visini prosječne konačne građevinske cijene na području općine Tešanj za 2017. godinu,
8. Izvještaj o radu Općinskog vijeća za period od 01.01. do 31.12.2017. godine,
9. Izvještaj Općinskog načelnika za period od 01.01. do 31.12.2017. godine,
10. Izvještaj o radu Općinskog pravobranilaštva za 2017. godinu,
11. Informacija o stanju bezbjednosti na području općine Tešanj i bezbjednosti učesnika u saobraćaju na području općine Tešanj za 2017.godinu,
12. Informacija o stanju u poljoprivredi i realizaciji Programa novčanih poticaja u 2017.godini.

Uz materijale koji su bili na dnevnom redu vijećnicima je dostavljena:

- Informacija o realizaciji odluka, rješenja i zaključaka Općinskog vijeća za period od 20.12.2017.godine do 31.12.2017.godine.

Ad. 1

Predsjedavajući Vijeća je prisutne podsjetio da je Prijedlog Odluke o izmjenama i dopunama Poslovnika o radu Općinskog vijeća Tešanj razmatran na 14.sjednici Općinskog vijeća, te da je nakon provedene rasprave usvojen zaključak da se nastavak pretresa i odlučivanja o Prijedlogu odloži za sljedeću sjednicu. Rok za dostavu amandmana je bio do početka sjednice. Dalje je napomenuo da se Vijeće neće izjašnjavati o amandmanima koji su podneseni na 14.sjednici jer je Kolegij Vijeća usaglasio stavove po pitanju izmjena i dopuna Poslovnika, i amandmane na prijedlog ove odluke u ime Kolegija podnio je Predsjedavajući Vijeća koji glase:

Amandman I Član 2. Odluke mijenja se i glasi:

“U članu 9. Poslovnika iza teksta "daju svečanu izjavu" dodaje se tekst koji glasi: "i potpisuju izjavu o poštivanju Kodeksa izabranih zvaničnika - vijećnika u Općinskom vijeću Tešanj", a iza teksta "predsjedavajućim Vijeća" dodaje se tekst "i zamjenikom predsjedavajućeg".”

Amandman II Poslije člana 4. Odluke dodaje se član 4a. koji glasi:

U članu 18. Poslovnika na kraju teksta brišu se riječi "kojeg odredi Vijeće".

Amandman III Član 7. stav (5) Odluke ispred teksta "predlaže Vijeću da izvrši zamjenu tih lica" dodaje se tekst koji glasi "sekretar".

Amandman IV Član 9. stav (2) iza riječi "i imenovanja bira" dodaje se riječ "Vijeće".

Amandman V U članu 11. Odluke briše se stav (2).

Amandman VI Član 12. Odluke briše se.

Amandman VII Član 13. Odluke mijenja se i glasi:

“Predsjednika radnog tijela u slučaju njegove odsutnosti zamjenjuje zamjenik predsjednika.

U komisijama koje broje pet članova u slučaju odsutnosti predsjednika i zamjenika, zamjenjuje ih član radnog tijela kojeg odredi radno tijelo.”

Amandman VIII U članu 14. stav (1) briše se.

Amandman IX U Odluci iza člana 14. dodaje se novi član 14a. koji glasi:

“Član 32. Poslovnika mijenja se i glasi:

„Komisija za izbor i imenovanje:

- u svom sastavu ima pet lica
- prati provođenje zakonskih odredaba, pretresa sva pitanja u vezi sa izborom, imenovanjem i razrješenjem, kao i druga pitanja u vezi sa tim iz nadležnosti Vijeća
- predlaže Vijeću izbor i razrješenje funkcionera i ostalih službenika koje Vijeće bira ili imenuje,
- vrši i druge poslove iz nadležnosti Vijeća u vezi sa izborom i imenovanjem.“

Amandman X U Odluci iza člana 22. dodaje se novi član 22a. koji glasi:

“Vijećniku se izdaje vijećnička legitimacija i uređaj za glasanje.

Vijećnička legitimacija i uređaj za glasanje ne smije se ustupati drugim osobama.

U vijećničku legitimaciju se uvodi ime i prezime vijećnika, imunitetsko pravo vijećnika i druga prava utvrđena posebnim propisima.

Vijećnička legitimacija ovjerava se pečatom Općinskog vijeća.

Sekretar Vijeća stara se o izdavanju i evidenciji izdatih vijećničkih legitimacija i uređaja za glasanje.”

Amandman XI U Odluci iza člana 23. dodaje se novi član 23a koji glasi:

“U članu 39. stav (1) Poslovnika tekst "sekretara Vijeća" briše se.

U stavu (2) iza teksta "Općinski načelnik" dodaje se "i sekretar Vijeća".”

Amandman XII U članu 25. stav (1) Odluke iza riječi "Vijećnik" dodaje se tekst "i svaki učesnik u raspravi".

U stavu (2) u dijelu teksta koji je u zagradi, iza riječi "investicija" briše se tekst "i sl".

Stav (3) mijenja se i glasi: "Vijećnici u raspravi imaju pravo na repliku u trajanju do tri minute, a vijećnik i drugi učesnik imaju pravo na ispravku krivog navoda do jedne minute.”

Amandman XIII U članu 29. Odluke stav (3) mijenja se i glasi: "Vijećnička inicijativa se podnosi pismeno

preko sekretara Vijeća, najkasnije sedam dana prije sjednice Vijeća, a može i pismeno na sjednici Vijeća.” Stav (4) mijenja se i glasi :”Po prispjelim mišljenju o pokrenutoj vijećničkoj inicijativi raspravlja se na sjednici Vijeća, ako je to prijedlog vijećnika predlagača.”

Amandman XIV Član 30. Odluke mijenja se i glasi: “U članu 57. Poslovnika u stavu (1) riječ “presjedavajućeg” zamjenjuje se “sekretara”.”

Amandman XV U članu 33. Odluke dodaje se stav (4) koji glasi “U članu 62. Poslovnika stav (6) koji glasi “Vijeće može ovlastiti predsjedavajućeg...”, briše se”.

Amandman XVI U Odluci nakon člana 33. dodaje se član 33a. koji glasi: “U članu 64 Poslovnika u stavu (2) i (6) tekst “karton sa bojom” briše se.

Amandman XVII U Odluci nakon člana 36. dodaje se član 36a. koji glasi: “Član 69 Poslovnika mijenja se i glasi: “Izborom novog predsjedavajućeg Vijeća ili novog zamjenika predsjedavajućeg Vijeća rukovodi aktuelni predsjedavajući Vijeća, a u slučaju njegove odsutnosti rukovodi zamjenik predsjedavajućeg Vijeća, a u slučaju njihove odsutnosti najstariji vijećnik.”

Amandman XVIII U člana 38. Odluke u stavu (2) tekst “i stalnih radnih tijela Vijeća” briše se. U stavu (3) tekst “nadležnoj službi” zamjenjuje se sa “sekretaru”.

Amandman XIX U članu 98. stav (1) iza teksta "Općinsko vijeće" dodaje se tekst "i stalna radna tijela". Stav (2) na kraju teksta iza riječi "Općine" upisati tačku, a ostatak teksta se briše.

Amandman XX Poslije člana 44. Odluke dodaje se član 44a. koji glasi:

“U članu 108. i 109. Poslovnika riječ “birač” zamjenjuje se sa tekstem “građanin sa pravom glasa”.

Amandman XXI Član 47. Odluke postaje član 48., a dodaje se novi član 47. koji glasi:

“Sve potrebne akte, propise i imenovanja potrebno je uskladiti sa ovom odlukom, a najkasnije u roku 7 mjeseci od dana stupanja na snagu ove odluke.”

U raspravi učestvovali vijećnici: Pašić Danijel, Piro Amir, Alić Munevera, Kurtić Amir, Kaser Vedran, Alić Hajrudin, Solo Fahir, Huskić Kasim i Hrnjić Muris.

Općinsko vijeće je jednoglasno sa 23 glasa “ZA”, bez glasova PROTIV” i “UZDRŽAN” usvojilo sljedeći

ZAKLJUČAK

Prihvataju se Amandmani na prijedlog Odluke o izmjenama i dopunama Poslovnika o radu Općinskog vijeća (od 1 do 22) koje je u ime Kolegija podnio Predsjedavajući Vijeća.

Općinsko vijeće je jednoglasno sa 23 glasa “ZA”, bez glasova PROTIV” i “UZDRŽAN” usvojilo sljedeći

ZAKLJUČAK

Usvaja se Prijedlog Odluke o izmjenama i dopunama Poslovnika o radu Općinskog vijeća Tešanj.

Zadužuje se nadležna komisija Vijeća da uradi konačan prečišćeni tekst Poslovnika o radu Općinskog vijeća Tešanj sa svim usvojenim izmjenama i dopunama.

Ad. 2

U raspravi o Prijedlogu Odluke o prodaji parcele oznake k.p. br. 1897/3 za k.o. Trepče učestvovali vijećnici: Pilav Elvir, Alić Munevera, Hasanbašić Senad i Općinski načelnik.

Općinsko vijeće je jednoglasno sa 23 glasa “ZA”, bez glasova “PROTIV” i “UZDRŽAN” usvojilo sljedeći

ZAKLJUČAK

Usvaja se Prijedlog Odluke o prodaji parcele oznake k.p. br. 1897/3 za k.o. Trepče.

Ad. 3

Pomoćnik Načelnika Hojkurić Hamzalija dodatno pojasnio Prijedlog Odluke o usvajanju planova potencijalnih projekata javno-privatnog partnerstva.

U raspravi učestvovali vijećnici: Kaser Vedran, Kurtić Amir, Alić Munevera i Općinski načelnik.

Općinsko vijeće je sa 21 glasom "ZA", bez glasova "PROTIV" i 2 glasa "UZDRŽAN" usvojilo sljedeći

ZAKLJUČAK

Da se podnese inicijativa Kantonalnoj Skupštini za izmjenu Zakona o JPP da važi zadnji usvojeni plan potencijalnih projekata javno privatnog partnerstva, a ne da se usvaja svake godine, da se ide u izmjenu Odluke samo kada se pojavi neki novi investitor. Inicijativu proširiti i na druge sporne odredbe zakona.

Općinsko vijeće je jednoglasno sa 23 glasa "ZA", bez glasova "PROTIV" i "UZDRŽAN" usvojilo sljedeći

ZAKLJUČAK

Usvaja se Prijedlog Odluke o usvajanju planova potencijalnih projekata javno-privatnog partnerstva.

Ad.4

Pomoćnik Načelnika Medarić Nadir dodatno pojasnio Prijedlog Odluke o pristupanju izradi Zoning plana "Poslovna zona Ljetinić" Tešanj.

U raspravi učestvovali vijećnik Deljković Nermin i Općinski načelnik.

Općinsko vijeće je jednoglasno sa 22 glasa "ZA", bez glasova "PROTIV" i "UZDRŽAN" usvojilo sljedeći

ZAKLJUČAK

Usvaja se Prijedlog Odluke o pristupanju izradi Zoning plana "Poslovna zona Ljetinić" Tešanj.

(Jedan vijećnik nije glasao-izašao iz sale)

Ad. 5

Pomoćnik načelnika Omerbašić Sabahudin uz prezentaciju dodatno pojasnio Izvještaj o realizaciji kapitalnih projekata za 2017.godinu.

U raspravi učestvovali vijećnici: Deljković Nermin, Alić Hajrudin, Huskić Kasim, Kaser Vedran, Kurtić Amir i Općinski načelnik.

Nakon toga, Općinsko vijeće je sa 7 glasova "ZA", bez glasova "PROTIV" i 15 glasova "UZDRŽAN", nije usvojilo prijedlog zaključka vijećnika Kaser Vedrana da se uradi detaljna lista svih realizovanih projekata u općini Tešanj za 2017.godinu sa tačnim iznosima učešća građana.

Općinsko vijeće je sa 15 glasa "ZA", bez glasova "PROTIV" i 7 glasova "UZDRŽAN", usvojilo sljedeći

ZAKLJUČAK

Usvaja se Izvještaj o realizaciji kapitalnih projekata za 2017.godinu.

Na prijedlog Kluba vijećnika SBiH pauza u radu vijeća trajala od 15,45 do 16,00 sati.

Ad. 6

Općinski načelnik je dodatno uz prezentaciju obrazložio Prijedlog Odluke o usvajanju Plana kapitalnih investicija za budžetsku 2018.godinu (sa planom kandidovanih investicija za 2019 i 2020) 1+2.

Na ovaj prijedlog Amandman je uložen od strane Općinskog načelnika, Klubova vijećnika SDP i SBiH.

Općinski načelnik je podnio Amandman za uvrštavanje nove stavke u tabelarnom dijelu pod E) Projekti od općeg interesa, dodaje se novi red pod brojem 6. Opći interes, „Izgradnja puta-proširenje i spajanje poslovnih zona Ciglana i Glinište“, iznos od 150.000,00 KM – Viši nivo vlasti, ukupno 150.000,00 KM. U zadnjem sabiranju iznosa dodaje se 150.000,00 KM na zbir, koji je postao sastavni dio Odluke.

Amandman Kluba vijećnika SDP koji glasi: „U članu 5. Odluke brišemo riječ „2018“ i upisujemo riječ „2019“ godine tako da tekst glasi: „O realizaciji ove Odluke Općinskom vijeću će biti podnesen Izvještaj početkom 2019.godine.“, je prihvaćen od strane Općinskog načelnika i postaje sastavni dio Odluke.“

U raspravi učestvovali vijećnici: Pašić Danijel, Deljković Nermin, Huskić Kasim, Piro Amir, Alić Hajrudin, Kaser Vedran, Kurtić Amir, Solo Fahir, Alić Munevera, Subašić Senad, Hasanbašić Senad, i Općinski načelnik.

Vijećnik Kaser Vedran je u svojoj diskusiji predložio zaključak „Da projekti koji nemaju potrebnu dokumentaciju da se ne realizuju (uvrštavaju na listu). O ovom prijedlogu zaključka nije bilo izjašnjenja. (Predsjedavajući Vijeća je konstatovao da ni do sada nije bilo takvih projekata i da smatra bezpredmetnim da se Vijeće o tome izjašnjava).

Nakon toga, **Općinsko vijeće sa 7 glasova “ZA”, bez glasova “PROTIV” i 16 glasova “UZDRŽAN”, nije usvojilo Amandman Kluba vijećnika SBiH koji glasi: „U tabeli E (informativno, drugi projekti, namjenska sredstva) dodati pačku 4. „Izrada kanalizacije u MZ Šije“ u iznosu od 200.000.00 KM iz lokalnog budžeta-kredita.“**

Općinsko vijeće je sa 18 glasa “ZA”, bez glasova “PROTIV” i 5 glasova “UZDRŽAN”, usvojilo sljedeći

ZAKLJUČAK

Usvaja se Prijedlog Odluke o usvajanju Plana kapitalnih investicija za budžetsku 2018.godinu (sa planom kandidovanih investicija za 2019 i 2020) 1+2,

Ad. 7

Bez rasprave, **Općinsko vijeće je jednoglasno sa 23 glasa “ZA”, bez glasova “PROTIV” i “UZDRŽAN” usvojilo sljedeći**

ZAKLJUČAK

Usvaja se Prijedlog Odluke o visini prosječne konačne građevinske cijene na području općine Tešanj za 2017.godinu.

Ad. 8

U raspravi o Izvještaju o radu Općinskog vijeća za period od 01.01. do 31.12.2017. godine učestvovali vijećnici: Kaser Vedran, Alić Munevera, Senad Subašić i Kurtić Amir.

Na prijedlog vijećnika Kurtić Amira, Općinsko vijeće je sa 20 glasova "ZA", bez glasova "PROTIV" i 1 glasom "UZDRŽAN" usvojilo sljedeći

ZAKLJUČAK

Da se na početnoj općinskoj Web stranici vrti baner sa informacijom kada je Građanski sat sa vijećnicima.

Na prijedlog vijećnika Subašić Senada, Općinsko vijeće je sa 21 glasom "ZA", bez glasova "PROTIV" i "UZDRŽAN" usvojilo sljedeći

ZAKLJUČAK

Općinsko Vijeće će u 2018.godini poduzeti sljedeće mjere poboljšanja u radu Općinskog vijeća i vijećnika:

1. Povećati komunikaciju – sastanci sa građanima, udruženjima, privrednicima (konferencija).
2. Prezentacija rezultata rada OV i radnih tijela OV (putem medija, letaka i slično)
3. Obuke vijećnika i članova radnih tijela.
4. Dodatna promocija građanskog sata.

Zadužuje se Predsjedavajući vijeća i Kolegij da u saradnji sa Općinskim načelnikom i nadležnom službom u toku 2018.godine provedu aktivnosti na ispunjenju zaključka i da o rezultatima informišu Općinsko vijeće.

Općinsko vijeće je sa 14 glasova "ZA", 5 glasova "PROTIV" i 2 glasa "UZDRŽAN" usvojilo sljedeći

ZAKLJUČAK

Usvaja se Izvještaj o radu Općinskog vijeća za period od 01.01. do 31.12.2017. godine.

Ad.9

Izvještaj Općinskog načelnika za period od 01.01. do 31.12.2017. godine.
Općinski načelnik je dodatno obrazložio Izvještaj.

U raspravi učestvovali vijećnici: Deljković Nermin, Alić Munevera, Pilav Elvir, Kurtić Amir, Kaser Vedran i Općinski načelnik.

Općinsko vijeće je sa 14 glasa "ZA", 5 glasova "PROTIV" i 1 glasom "UZDRŽAN" usvojilo sljedeći

ZAKLJUČAK

Usvaja se Izvještaj Općinskog načelnika za period od 01.01. do 31.12.2017. godine.

Pauza u radu Vijeća trajala od 18,15 do 18,20 sati.

Ad.10

Općinski pravobranilac Brkić Arijana je dodatno obrazložila Izvještaj o radu Općinskog pravobranilaštva za 2017. godinu,

U raspravi učestvovao vijećnik Kurtić Amir i Općinski pravobranilac.

Općinsko vijeće je jednoglasno sa 19 glasova “ZA”, bez glasova “PROTIV” i “UZDRŽAN” usvojilo sljedeći

ZAKLJUČAK

Usvaja se Izvještaj o radu Općinskog pravobranilaštva za 2017.godinu.

Ad.11

U raspravi o Informacija o stanju bezbjednosti na području općine Tešanj i bezbjednosti učesnika u saobraćaju na području općine Tešanj za 2017.godinu učestvovali vijećnici: Alić Hajrudin, Kurdić Adem i Komandir Policijske stanice Katica Jusuf.

Općinsko vijeće je jednoglasno sa 20 glasova “ZA”, bez glasova “PROTIV” i “UZDRŽAN” usvojilo sljedeći

ZAKLJUČAK

Prima se na znanje Informacija o stanju bezbjednosti na području općine Tešanj i bezbjednosti učesnika u saobraćaju na području općine Tešanj za 2017.godinu.

Ad.12

Pomoćnik Načelnika Hojkurić Hamzalija je dodatno obrazložio Informacija o stanju u poljoprivredi i realizaciji Programa novčanih poticaja u 2017.godini.

O Informaciji diskutovao vijećnik Huskić Kasim.

Općinsko vijeće je sa 19 glasova “ZA”, bez glasova “PROTIV” i “UZDRŽAN” usvojilo sljedeći

ZAKLJUČAK

Prima se na znanje Informacija o stanju u poljoprivredi i realizaciji Programa novčanih poticaja u 2017.godini.

Ad.B

VIJEĆNIČKE INICIJATIVE

Vijećnik Nermin Deljković je podnio vijećničku inicijativu koja glasi: „Da nadležna Općinska služba postavi ogledalo koje omogućava bolju preglednost učesnika u saobraćaju, MZ Vukovo, izlaz iz mjesta Banovac na Regionalni put Šeher – Prnjavor R347 (na putu Jelah – Tešanj, iz pravca Jelaha 1,5 kilometar, 50-ak metara prije Hrvić Gradnje desno i mjesnog groblja sa lijeve strane, put lijevo vodi u zaseok Banovci).“

Vijećnik Hodžić Enes je postavio vijećničku inicijativu o poboljšanju uslova u azilu za pse koja glasi:

„U cilju poboljšanja uslova u azilu smatram da je neophodno:

1. Povećati transparentnost, rada azila za pse (uvid odluke o formiranju azila i načinu njegovog rada, analiza utroška sredstava kroz izvještaje, redovni obilasci i kontrola rada od strane nadležnih).
2. Raditi na poboljšanju uslova života napuštenih pasa u azilu (redovna ishrana, veterinarska kontrola, proširenje kapaciteta, odvojeni prostori za štenad, u zimskim mjesecima obezbijediti slamu za prostore gdje psi spavaju...)
3. Omogućiti zainteresovanim građanima da učestvuju u poboljšanju azila, omogućiti im pristup, unošenje hrane, udomljavanje, eventualno nalaženje donatora, volonterski rad, (član 28 Zakona o zaštiti i dobrobiti životinja FBiH).
4. Angažovati veterinarskog inspektora shodno zakonu o zaštiti životinja (član 27 i 38 Zakona o zaštiti i dobrobiti životinja FBiH).“

Općinski načelnik odgovorio: Pokrenuli smo aktivnosti, sa upraviteljem tim azilom, na projektovanju trajnijeg rješenja. Kad je to tek doneseno, kao zakonska obaveza, svi su mislili da je to kratkotrajna stvar, nemojte da tu puno ulažemo. U procesu smo projektovanja trajnijeg rješenja sa kvalitetnijim objektima. Interventno smo reagovali krajem prošle godine za poboljšanje nekih uslova za rad u tom azilu, za obezbjeđenjem dodatnih sredstava za nabavu kontjnera za osoblje koje tamo radi, za popravku ograde a Ugovorom koji smo potpisali, u upravljanju ovim azilom za ovu godinu smo predvidjeli određene mjere i očekujemo da ćemo imati spreman projekat prije kraja ovog ljeta, da ćemo moći kandidovati drugima, pa eventualno ukoliko ne budemo imali vanjskih izvora sredstava, obezbijedićemo investiranje kroz Budžet Općine 2019. i naredne godine.

Vijećnik Danijel Pašić je postavio vijećničku inicijativu koja glasi: „Da nadležna služba postavi ogledalo koje omogućava bolju preglednost učesnika u saobraćaju na lokalitetu kroz naseljeno mjesto Jelah (križanje ulice Kasima Salkičevića i Pousorske ulice).“

Vijećnik Nermin Deljković je postavio sljedeće vijećničko pitanje: „Da li se eksploatacija kamena u MZ Tešanj i MZ Kalošević vrši u skladu sa zakonom? Ako jeste, koliko je Općina Tešanj do sada dobila sredstava na ime eksploatacije kamena i da li su sredstva usmjerena na MZ gdje se eksploatacija vrši, kako to nalažu zakoni o koncesijama?“

Općinski načelnik odgovorio da Općina nema dodijeljenog koncesionara za eksploataciju kamena, da je postojala inicijativa, koja je odbijena... za pripremne i istražne radnje postoje drugi propisi. To je kantonalna nadležnost. Nema koncesionara za Trepče, Tešanj i Kalošević po pitanju mineralnih sirovina.

Vijećnik Vedran Kaser je postavio sljedeća vijećnička pitanja:

1. „Kada će biti vraćena ploča sa imenom dvorane „Partizan“ na objekat nove sportske dvorane u Musali?“
2. „Da li je tačno da je, nakon imenovanja novog direktora JU Bolnica Tešanj, došlo do nezakonitog otpuštanja radnika, a da su neki nakon presude suda, u svoju korist, vraćeni na posao?“

Općinski načelnik je odgovorio da nije upoznat da je postojalo vraćanja nekih radnika nakon postupaka, te zamolio konkretnije pitanje.

Vijećnik Jašić Haris je postavio sljedeće vijećničko pitanje: „Zašto nije i kada će u funkciju biti stavljeno taxi stajalište kod Centra za kulturu i obrazovanje?“

Općinski načelnik odgovorio da je upravljanje ovim prostorom vezano za usvajanje odluke urbanistički projekat, i ranije je odgovoreno da će to biti tačka dnevnog reda. Kolegij će biti upoznat prije toga, da se približi materiji upravljanja tim prostorom, šta su zakonske mogućnosti i šta je interes zajednice za otvaranje hotela. Prijedlog Odluke se očekuje na sljedećoj sjednici Općinskog vijeća koja će tretirati i upravljanje tim prostorom. Vlasništvo je općinsko, ona je uređivala taj prostor a upravljanje će se riješiti kroz tu odluku.

Vijećnik Danijel Pašić je postavio sljedeća vijećnička pitanja:

1. „Da li je imenovanje direktora JZU Apoteka „Tefarm“ Tešanj sprovedeno po Zakonu o zdravstvenim ustanovama i prema Pravilniku o uslovima imenovanja direktora JZU?“

Općinski načelnik je odgovorio da je po zakonu završeno imenovanje direktora JZU Apoteka „Tefarm“ Tešanj. Ako neko ima primjedbu može konkretnije pitati i uputiti primjedbu.

2. Šta Općinski načelnik planira poduzeti kako bi parkinzi na prostoru općine Tešanj počeli poslovati u skladu sa zakonom?

Općinski načelnik je zamolio da se ovo pitanje dopuni - na koje se parkinge misli, na neovlašteno korištenje općinske imovine ili na parkinge u privatnom vlasništvu.

Vijećnik Pilav Elvir je postavio sljedeće vijećničko pitanje: „Koliko je sredstava Općina Tešanj dobila na ime koncesija na vodu i na koji način su utrošena?“

Općinski načelnik je odgovorio da je koncesija bila na 5.tački dnevnog reda, da tamo piše koliko je koncesija bilo u prošloj godini i kako su rasporedene, te da Vijeće svake godine dobija plan i izvještaj utroška koncesija.


Vijećnik Solo Fahir je postavio sljedeće vijećničko pitanje: “Ko je zadužen za uklanjanje uginulih životinja sa cesta i drugih javnih površina?“

Općinski načelnik odgovorio da su za uklanjanje uginulih životinja sa cesta i drugih javnih površina zaduženi oni koji se brinu o održavanju. Općina ima za dio gdje je ugovorena komunalna higijena to je Tešanj, Jelah i neka uža gradska područja urbana jezgra. Mislim da su na magistralnim i regionalnim cestama ljetno i zimsko održavanje na dvije godine - ugovore potpisali Rial i Dobojuptevi, a ako vas bude nešto konkretno zanimalo možemo provjeriti tačne informacije.

Nakon toga, predsjedavajući Vijeća se svima zahvalio na prisustvovanju današnjoj sjednici i zaključio rad petnaeste sjednice Općinskog vijeća Tešanj u 19,10 h.

ZAPISNIČAR:

Sajda Klepić



PREDSJEDAVAJUĆI VIJEĆA
Senad N. Subašić, dipl.oec.